

Woar of niet woar?

deur Dick van Bloemendaal

Hele kleine verhaoltsjes die soms warkeluk gebeurd bin en verhaoltsjes die ik uut mun duum 'ezeugen het. Vur julie un vraag, mar vur mien un weet, welke wel of niet woar bin.

November

In de Achterstraot, woar noen ongeveer de woeninginrichting van Kok is, stung vrogger un mooie grote boerderie van Marten Meeboer. Marten het al die jaoren dat'ie daor boerde de wind aordug mee e'had. Z'n koeien gavven veul melk en de melkfebriek betaolde un beste pries vur elke liter die ane'leverd werd. Ok de landbouw floreerde aordig, veul erepels, rogge en mais. Kortum, Marten had niks te klagen.

Tegenover um stung de bakkerie van Peter van Meerveld, dé bakker van Putten in die tied. Umdat hie geen concurentie had, was'ie arg druk mit ut bakken van brood, koekjes, gebak en speekelaosjes. Peter en Marten waren goeie burenen mit mekaar, mar as ze de kans kregen, nammen ze mekaar wel in ut ootje, en ze kossen dur allebei goed tegen.



Zowel Marten as Peter han allebei un varken in ut hok vur de slacht. In november, de slachmaond, kwam Sebus Blom, de plaotseluke slachter, um de beesten un kopje kleiner te maken. Dat gebeurde meestal in ut achterhuus en dan werd ut varken op de leer e'bunden um af te starven, buuten tegen de achtergevel. As ut varken op de leer hung, kwammen ze effe bie mekaar naor ut varken kieken

en as ze ut goed bevunnen han, gunnen ze naor binnen en nammen dur un jonge klaore op.

Toen bie Peter ut varken op de leer hung, wou Marten un geintje uuthaolen. Hie zei tegen z'n knecht dat as ze naor binnen gungen vur de jonge klaore, hie snel en ongezien un oor van ut varken mos ofsnieën en mee naor huus nemen. En zo e'zeid, zo e'daon, de knecht het mit un scharp mes ut linker oor van ut varken ofe'sneeën en mee e'neumen.

Toen Peter en Marten weer naor buuten kwammen gungen ze nog effe naor ut varken kieken en Peter sneerde aordug op over de mooie dikke leeg spek en plotseling doet Marten de ontdekking dat ut varken mar èèn oor het. Peter snapt dur niks van en hie zeid : "och, ik geleuf dat Sebus ut oor of e'sneeën het vur z'n vrouw, um in de snart te doen". En door was de kous mee of. Mar Peter wist wel beter dat Marten hum un poets had e'bakken en hie zei tegen de bakkersknecht dat ie bie Marten nao de slacht de start van ut varken mos snieën as ze naor binnen waren um un jonge klaore in te nemen.

Toen un paor weken laoter Sebus bie Marten kwam slachten en ut varken achter ut huus op de leer hung, kwam Peter naor ut varken kieken en toen ze ut goed bevunnen han, gungen ze naor binnen um dur op te toosten. De bakkersknecht het toen merakuls vlug de start van ut varken of e'sneeën en mee naor huus e'neumen. Nao de borrel gingen ze nog effe naar ut beest kieken en toen zeid Peter : "dat varken van jou is un beetje un misbaksel, hie het geen start an z'n koent", waarop Marten heel dreug zeid dat Sebus die mee e'neumen het vur de snart van z'n vrouw.

Peter bakte elke week un grote mik vur Marten z'n vrouw en toen het Peter de varkensstart in de mik e'rold en mee e'bakken. Nao dat vrouw Meeboer un paor sneeën van de mik had ofe'sneeën, stuitte ze mit ut mes op iets hards en toen ze beter keek, zag ze

de varkensstart in ut brood zitten. Naodat Marten de start dur uut e'haold had is'ie dur mee naor de bakkerie e'gaon um te vragen of ze ok brood kunne bakken zonder un groot gat dur in. Ze hen dur allebei smakeluk um kunne lachen en as kompesaosie hen ze dur nog mar un jonge klaore op e'neumen.

+++